



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Distritu Ainaro

27 Abril 2015

JSMP kontinua organiza treinamentu kona-ba justisa ba ema hotu iha Suku Ainaro Villa-Distritu Ainaro

Iha 24 Abril 2015, Unidade Legal Research (LRU) no Unidade Relasaun Públiku (Outreach), JSMP realiza treinamentu ba iha comunidade Suku Ainaro Vila, Distritu Ainaro.

Materia treinamentu ne'ebé apresenta no diskuti durante sesaun treinamentu ne'e-mak kona-ba konseitu báziku direitus umanus, provizaun relevantes sira iha Kódigu Penál, Lei Kontra Violénsia Doméstika, Kódigu Prosesu Penál no tipu kazu krime sira ne'ebé maioria akontese iha sosiedade nia leet.

“Treinamentu ne'e hanesan atividade kontinuasaun hodi kontinua habelar informasaun ba comunidade sira kona-ba asesu ba justisa formal no hasa'e koñesimentu hosi grupu alvu sira ne'e kona-bá oinsa atu prosesu sira nia kazu atraves husi justisa formal,” dehan Diretór Ezekutivu JSMP, Luis de Oliveira Sampaio.

Treinamentu ne'e partisipa hosi ema hamutuk nain 30, ne'ebé kompostu hosi feto nain 17 no mane nain 13. Partisipante sira ne'e mai hosi estrutura suku, representante grupu feto, lia nain, joventude feto no membru comunidade feto sira.

Aleinde ne'e diskuti mós kna'ar no responsabilidade institucional hosi kada autór judisiáriu hanesan juis, ministériu públiku no ajente prosesuál sira hanesan defensor públiku, advogadu privadu, polísia. Treinamentu ne'e mós foka ba direitu no dever tuir lei aplikavel se ema ruma sai nu'udar arguidu, vítima no testemuña iha krime ruma.

Xefe Suku Ainaro, Sr. Agapito Freitas Martins iha sesaun abertura hato'o obrigadu no apresiasaun ba JSMP nia prezensa no inisiativa hodi hakat ba iha sira nia suku hodi fahe informasaun kona-ba lala'ok justisa formal ne'e ba sira. Tanba informasaun ne'e importante no útil tebes ba sira nia suku.

Xefi suku ne'e hatutan liutan katak kazu krime sira liu-liu krime ho natureza violénsia doméstika ne'ebé akontese iha sira nia suku maibé sira barak mak seidauk hatene oinsa atu hahu prosesu

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

kazu sira ne'e tuir justisa formal. Xefe Suku mós haktuir katak maizumenus durante nia kaer kna'ar hanesan xefe suku durante tinan sanulu resin ona, formalmente sira nunca simu kualker forma divulgasaan informasaun hosi Ministériu Justisa kona-ba funksionamentu sistema justisa formal.

Iha enseramentu, Xefe Suku hato'o agradesementu ba JSMP tanba fahe informasaun kona-ba lalaok justisa formal ba sira nia suku no agradese mós ba doador sira ne'ebé apoiu no fasilita hodi prosesu trenamentu ne'e bele to'o iha sira nia suku no aldeia.

JSMP observa katak partisipante sira ativu teb-tebes atu husu pergunta relasiona ho krime violénsia doméstika no krime sira seluk ne'ebé dala barak akontese iha sira nia suku no aldeia. Alende ne'e partisipantes sira kestiona kona-ba balansu entre direitu no dever hosi sidadaun ida-idak tanba dalaruma mosu problema tanba ema barak ejize deit mak sira direitu.

Relasiona ho kestaun hirak ne'e, JSMP hakuir katak normalmente direitu no dever tenke la'o hanesan. Situsaun sira ne'e dalabarak akontese tanba limitasan informasaun no koñesementu kada sidadun mak limitadu.

JSMP hein katak ho atividade treinamentu ne'e, bele kontinua hametin diak liu tan koñesimentu comunidade iha área rural sira, no liu-liu atu fasilita sira kona-bá opsaun oinsa atu trata kazu ho natureza krime semi públiku no públiku ne'ebé involve sira nia membru familia.

Treinamentu ne'e realiza ho apoiu finanseiru hosi **UNDEF**.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org